

新刊權載之文集

權載之文集卷第六

唐權德輿載之

雜詩

早夏青龍寺致齋憑眺感物因書十四韻

寺壁有舅
氏庶子詩

曉出文昌宮
憇茲青蓮宇
潔齋奉明祀
憑覽傷曩古
秦爲三月火
漢乃一坏土
詐力自湮淪
霸儀終莽鹵
中南橫峻極
積翠洩雲雨
首夏諒清和
芳陰接場圃
仁祠闕巖淨
稽首洗靈府
虛室僧正禪
危梁鷲初乳
通莊走犢利
結駟乃旁午
觀化復何如
剏心信爲愈
盛時忽過量

弱質本無取靜永環中樞益愧腰下組塵勞期抖擻陟
降輒俯僂遺韻留壁間淒然感東武

仲秋朝拜昭陵

清秋壽原上詔拜承吉卜嘗讀貞觀書及茲幸齋沐文
皇昔潛躍隋季自顛覆撫運斯順人救焚非逐鹿神祇
戴元聖君父納大麓良將授兵符直臣調鼎餽無疆傳
慶祚有截荷亭育仙馭浚紫氛神遊弃黃屋方祇護山
跡先正陪巖腹杳杳九嶷深沉沉萬靈肅鳥飛田已闢
龍去雲猶簇金氣爽林巒乾岡走崖谷吾皇宏孝理率
土蒙景福擁佑乃清夷威靈諒回復禮承三公重心愧

二卿祿展敬何所伸曾以斧山木

拜昭陵出城與張秘監閣老同里臨行別承在
史館未歸尋辱清辭輒酬之

仲月當南呂晨裝拜穀林逢君在東觀不得話離襟策
馬緣雲路開緘扣玉音還期纔浹日里社酒同斟

酬馮監拜昭陵迴途中遇雨見示

之子共乘輶清秋拜上霄

寢宮有上霄門

曙霞迎風駕零雨濕

迴鑣甘谷行初盡軒臺去漸遙望中猶可辨耘鳥下山

椒

朔旦冬至攝職南郊因書卽事

大明南至慶天正朔旦圓丘樂六成文軌盡同堯歷象
齋祠忝備漢公卿星辰列位祥光滿金石交音曉奏清
更有觀臺稱賀處黃雲捧日瑞昇平

奉和張監閣老過八陵院題贈杜卿崔員外

崇飾山園孝理深萬方同感聖人心已聞東閣招從事
每向西垣奉德音公府從容談婉婉賓階清切景沉沉
與君跬步如同舍終日相期此盍簪

奉和鄭賓客相公攝官豐陵扈從之作

時充國
簿使

五輅導靈輜千夫象繚垣行宮移曉漏綵仗下秋原莫
究希夷理空懷渙汗恩頤神方蹈道傳聖乃遵尊共祝

如山壽俄驚遷凡言遐荒七月會盼嚮百靈奔豹尾從
風直鸞旗暎日翻塗芻聯法從營騎肅旌門杳靄虞泉
夕淒清楚挽喧不堪程盡處鳴咽望文園

詹事府宿齋絕句

清齋四體泰白晝一室空摧頽有古樹驪屑多悲風

和王祭酒太社宿齋不得赴李尚書宅會戲書

見寄

元禮門前勞引望勾龍壇下阻歡娛此時對局空相憶
博進何人更樂輸

酬裴端公八月十五日夜對月見懷

涼夜清秋半空庭皓月圓動搖隨積水皎潔滿晴天多
病嘉期阻深情麗曲傳偏懷賞心處同望庾樓前

奉和崔閣老清明日候許閣老交直之際辱裴

閣老書招云與考功苗曹長先城南遊覽獨

行口號因以簡贈

時德輿以疾故有阻追遊

紫禁宿初迴清明花亂開相招直城外遠遠上春臺諫
曹將列宿幾處期子玉深竹與清泉家家桃李鮮折芳
行載酒勝賞隨君有愁疾自無悰臨風一搔首

和張秘監閣老獻歲過蔣大拾遺因呈兩省諸

公並見示

二賢同載筆久次入新年焚草淹輕秩藏書厭舊編竹
風晴翠動松雪瑞光鮮慶賜行春令從茲佇九遷

酬崔舍人閣老冬至日宿直省中奉簡兩掖閣
老並見示

令節一陽新西垣宿近臣曉光連鳳沼殘漏近鷄人白
雪飛成曲黃鐘律應均層霄翔迅羽廣陌駐歸輪清切
晨趨貴恩華夜直頻輟才時所重九月中秋楊閣老
權知吏部選事分命
秩皆真十月中秋崔閣老正拜本官德輿正
除禮部受命前一日分草詔詞左掖期連苑
南宮愧積薪九年叨此地迴首倍相親

八月十五日夜瑤臺寺對月絕句

麻女乘鸞已上天仁祠空在鼎湖邊涼風遙夜清秋半

一望金波照粉田

仁祠寺也見後漢書楚王英傳

夏至日作

璿樞無停運四序相錯行寄言赫羲景今日一陰生

二月二十七日社兼春分端居有懷簡所思者
清晝開簾坐風光處處生看花詩思發對酒客愁輕社
日雙飛鶯春分百囀鴛所思終不見還是一含情

甲子歲元日呈鄭侍御明府

萬里煙塵合秦吳遂眇然無人來上國灑淚向新年世
故看風葉生涯寄海田屠蘓聊一醉猶賴主人賢

七夕

佳期人不見天上喜新秋玉佩霽清露香車渡淺流東
西一水隔迢遞兩年愁別有穿針處微明月映樓

嘉興九日寄丹陽親故

窮年路岐客西望思茫茫積水曾南渡浮雲失舊鄉海
邊尋別墅愁裏見重陽草露荷衣冷山風菊酒香獨語
看墜葉遠目遍秋光更美登攀處煙花滿練塘

九日北樓宴集

蕭颯秋聲樓上聞霜風漠漠起陰雲不見攜觴王太守
空思落帽孟參軍風吟蟋蟀寒偏急酒泛茱萸晚易醺

心憶舊山何日見併將愁淚共紛紛

奉陪李大夫九日龍沙宴會

選字

龍沙重九會千騎駐旌旗水木秋光淨綵桐雅奏遲煙
蕪斂暝色霜菊發寒姿今日從公醉全勝落帽時

臘日龍沙會絕句

簾外寒江千里色林中罇酒七人期寧知臘日龍沙會
却勝重陽落帽時

嚴陵釣臺下作

絕頂聳蒼翠清湍石磷磷先生晦其中天子不得臣心
靈棲顯氣纓冕猶緇塵不樂禁中卧却歸江上春潛驅

東漢風日使薄者醇焉用佐天子持此報故人則知大
賢心不獨私其身弛張有深致耕釣陶天真奈何清風
後擾擾論屈伸交情同市道利欲相紛綸我行訪遺臺
仰古懷逸民贈繳鴻鵠遠雪霜松桂新江流去不窮山
色凌秋旻人世自今古情輝照無垠

曉發武陽館卽事書情

清晨策羸車嘶嘶聞村鷄行將騎吏親日與情愛睽東
風變林樾南畝事耕犁青菰冒白水方塘接廣畦雜英
被長坂野草蔓幽蹊歸鹵成坂壤枯株發柔荑芳樹鬻
命鵲深林鷹引鷹杳杳途未極團團日已西哲士務纓

弁郎夫戀蓬蒿終當稅塵駕盟濯依春溪

豐城劒池驛感題

龍劒昔未發泥沙相晦藏向非張茂先孰辨斗牛光神
物不自達聖賢亦彷徨我行豐城野慷慨心內傷

奉使宜春夜渡新淦江陸路至黃蘗館路上遇

風雨作

草草理夜裝涉江又登陸望路殊未窮指期今已促傳
呼戒徒御振轡轉林麓陰雲擁帟端淫雨當山腹震雷
如在耳飛電來照目獸迹不敢窺馬蹄唯務速虔心若
齋禮濡體如沐浴萬竅相怒號百泉暗奔瀑危梁慮足

跌峻坂憂車覆問我何以然前日受微祿轉知人代事
纓組乃撤束向若家居時安枕春夢熟遵途稍已近候
吏來相續曉霽心始安林端見初旭

細柳驛

細柳蕭軍令條侯信殊倫棘門乃兒戲從古多其人神
武今不殺介夫如縉紳息駕幸茲地懷哉竦精神

渭水

呂叟年八十皤然持釣釣意在靜天下豈唯食營邱師
臣有家法小白猶尊周日暮駐征策愛茲清渭流

宮人斜絕句

一路斜分古驛前
陰風切切晦秋煙
鉛華新舊共冥冥
日暮愁鴟飛野田

敷水驛

空見水名敷
秦樓昔事無
臨風駐征騎
聊復捋髭鬚

朝元閣

繚垣複道上
曾看十月離宮萬國朝
胡馬忽來清蹕去
空餘臺殿照山椒

石甕寺

石甕寒泉勝寶井
汲人迴挂青絲綆
厨煙半逐白雲飛
當晝老僧來灌頂

盤豆驛

盤豆緣雲上古郵望思臺下使人愁江充得計太子死
日暮戾園風雨秋

晚渡楊子江却寄江南親故

反照滿寒流輕舟任搖漾支頤見千里煙景非一狀遠
岫有無中片帆風水上天清去鳥滅浦迤寒沙漲樹晚
登秋風江空翻宿浪胷中千萬慮對此一清曠迴首碧
雲深佳人不可望

新安江路

深潭與淺灘萬轉出新安人遠禽魚淨山深水木寒嘯

起青蘋末吟矚白雲端卽事遂幽賞何必挂儒冠

月夜江行

扣舷不得寐浩露清衣襟彌傷孤舟夜遠結萬里心幽興惜瑤草素懷寄鳴琴三奏月初上寂寞寒江深

江城夜泊寄所思

客程殊未極艤棹泊迴塘水宿知寒早愁眠覺夜長遠鍾和暗杵曙月照晴霜此夕相思意搖搖不暫忘

陪包諫議湖墅路中舉帆

同用山字

蕭蕭涼雨歇境物望中閑風際片帆去煙中獨鳥還斷橋通遠浦野墅接秋山更喜陪清興樽前一解顏

富陽陸路

又入亂峯去遠程殊未歸煙蘿迷客路山果落征衣
石臨清淺晴雲出翠微漁潭明夜泊心憶謝元暉

石塘路有懷院中諸公

迴合千峯裏晴光似畫圖征車隨反照候吏暎寒蕪
石瀨侵行逕溪雲拂路隅未酬知己分寧敢學潛夫

玉山嶺上作

悠悠驅疋馬征路上連崗晚翠深雲竇寒苔淨石梁荻
花偏似雪楓葉不禁霜愁見前程遠空郊下夕陽

舟行夜泊

蕭蕭落葉送殘秋寂寞寒波急暝流今夜不知何處泊
斷猿晴月引孤舟

曉發桐廬

客路去漫漫桐溪上水灘扣船乘曉月欹枕聽迴灘煙
重江楓濕沙平宿鷺寒閑吟試一望疑在畫屏看

夜汎臨平湖有寄

素彩皓通津孤舟入清曠已愛隔簾看還宜卷簾望隔
簾卷簾當此時惆悵思君君不知

次滕老莊

征途無旅館當晝喜逢君羸病仍留客朝朝掃白雲

曉

曉風搖五兩殘月映石壁稍稍曙光開片帆在空碧

晝

孤舟漾暖景獨鷁下秋空安流日正晝淨綠天無風

晚

古樹夕陽盡空江暮靄收寂寞扣船坐獨生千里愁

夜

猿聲到枕上愁夢紛難理寂寂深夜寒清霜落秋水

宿嚴陵

身羈從事驅征傳江入新安泛暮濤今夜子陵灘下泊

權軍之女集

卷六

自慙相去九牛毛

權軍之女集卷第六

權載之文集卷第七

唐權德輿字載之

雜詩

奉和韋諫議奉送水部家兄上後書情寄諸兄
弟仍通簡南宮親舊並呈兩省閣老院長

駟牡龍旂慶至今一門儒服耀華簪人望皆同照乘寶
家風不重滿簾金護衣直夜南宮靜焚草清時左掖深
何幸末班陪兩地陽春欲和意難任

奉和史館張閣老以許陳二閣長愛弟俱爲尚
書郎伯仲同時列在南北省會於左掖因而

有詠

伯仲盡時賢平與與潁川桂枝嘗偏折棣萼更相鮮丹
地晨趨並黃扉夕拜聯豈如分侍從來就鳳池邊主客
水部
二員東西對行二閣老併在左掖也時議
以爲分就西垣則具美相類故戲書未韻

韋賓客宅與諸博士宴集

累抗乞身章湛恩比上庠賓筵徵稷嗣家法自扶陽簪
組歡言久琴壺雅興長陰嵐冒苔石輕籟韻風篁佩玉
三朝貴揮金百慮忘因知卧商雒豈勝白雲鄉

酬張秘監閣老喜太常中書二閣老與德輿同

日遷官相代之作

時秘書監亦
同日拜命

珠樹共飛樓分封受紫泥正名推五字貴仕仰三珪繼
組心知忝德輿代太常爲禮部腰章事頗齊蓬山有佳句喜氣在
新題

國子柳博士兼領太常博士輒申賀贈

博士本秦官求才帖職難臨風曲臺淨對月璧池寒講
學分陰重齋祠曉漏殘朝衣辨色處雙綬更宜看

過隱者湖上所居

蝸舍映平湖皤然一魯儒唯將酒作聖不厭谷名愚兵
法窺黃石天官辨白榆行看軟輪起未可號潛夫

從叔將軍宅薔薇花開太府韋卿有題壁長句

因以和作

環列從容蹀躞歸光風飴蕩發紅薇
鸞藏密葉宜新霽蝶遶低枝愛晚暉
艷色當軒迷舞神繁香滿逕拂朝衣
名卿洞壑仍相近佳句新成和者稀

奉和許閣老霽後慈恩寺杏園看花同用花字

口號

時德輿當直

杏林微雨霽灼灼滿瑤華左掖期先至
中園景未斜含毫歌白雪藉草醉流霞
獨限金闈籍支頤啜茗花

奉和陳閣老寒食初假當直從東省往集賢因

過史館看木瓜花寄張蔣二閣老

書漏沉沉倦瑣闌西垣東觀閱芳菲繁花滿樹似留客
應爲主人休澣歸

晚秋陪崔閣老張秘監閣老苗考功同遊昊天
觀時楊閣老新直未滿以詩見寄斐然酬和
有媿蕪音

方駕遊何許仙源去似歸縈迴留勝賞蕭灑出塵機泛
菊賢人至燒丹姹女飛步虛清曉籟隱机吸晨暉竹逕
琅玕合芝田沆瀣晞銀鈞三洞字瑤笥六銖衣麗句翻
紅葉佳期限紫微徒然一相望郢曲和應稀

春日同諸公過兵部王尙書林園

休沐君相近時容曳履過花間留客久臺上見春多松
色明金艾鸞聲雜玉珂更逢新酒熟相與藉庭莎

與沈十九拾遺同遊棲霞寺上方夜於亮上人

院會宿二首

攝山標勝絕暇日諧想腸縈紆松路深繚繞雲巖曲重
樓迴樹杪古像鑿山腹人遠水木清地深蘭桂馥層臺
聳金碧絕頂摩淨綠下界誠可悲南朝紛在目焚香入
古殿待月出深竹稍覺天籟清自傷人世促宗雷此相
遇偃傲從所欲清論松枝低閑吟茗花熟一生如土梗
萬應相桎梏永願事潛師窮年此棲宿

偶來人境外心賞幸隨君古殿煙霞夕深山松桂蕭巖
花點寒溜石磴掃春雲清淨諸天近誼塵下界分名僧
康寶月上客沈休文共宿車林夜清猿徹曙聞

棲霞寺雲居室

一逕縈紆至此窮山僧盥漱白雲中閑吟定後更何事
石上松枝常有風

天竺寺

香刹西天寺昔遊如夢中煙蘿迷俗駕猿狖應山童蕭
颯松陰靜欹危石襪通雲霞棲半壁丹紺照晴空世累
悲何已心期惜未同相看整歸騎花雨夕濛濛

題邵端公林亭

春光何處足，柱史有林堂。
鸚鵡風初暖，花開日欲長。
吟池通舊水，掃逕閱新芳。
更置盈樽酒，時時醉楚狂。

題隱者所居

一逕茅茨下，千峯麋鹿羣。
鴻妻同懶逸，漁父每知聞。
日暮鳥擇木，天陰山出雲。
此心終不動，鼓腹向堯君。

題崔山人草堂

竹逕茆堂接洞天，閑持麈尾漱春泉。
世人車馬不知處，時有歸雲到枕前。

徐孺亭馬上口號

并序

鍾陵東湖之南有亭亭中有二碑一則故曲江張公所
製徐徵君碣一則北海李公所製放生池碑職夫二君
子久隨化往而二文之盛傳於天下貞元初余爲是邦
從事每將迎郊勞多經是間且以其尙賢好生皆醇仁
之旨也因歎不得與二賢同時論文變損益亭址圯壤
苔篆磷缺古風如在感舊依然而通衢在側平湖在下
波流轂擊日月無窮因於馬上口號絕句詩一首以寄
愀愴

湖上荒亭臨水開龜文篆字積莓苔曲江北海今何處
盡逐東流去不迴

哭劉四尙書勒於碑陰

士友惜賢人天朝喪守臣才華推獨步聲氣幸相親
理析環中妙儒爲席上珍笑言成月旦風韻挹天真丹地
膺推擇青油寄撫循豈言朝象魏翻是卧漳濱命賜龍
泉重追榮密印陳撤絃驚物故庀具見家貧牢落風悲
笛汎瀾涕泣巾只嗟蒿里月非復柳營春黃絹碑文在
青松隧路新音容無處所歸作北邙塵

張工部至薄寒山下有書無由馳報驕車之至
倍切悲懷

書來遠自薄寒山繚繞洮河出古關今日難裁秣陵報

薤歌寥落柳車還

工部發引日屬傷足卧疾不遂執紼

子春傷足日况有寢門哀元伯歸全去無由白馬來笳
簫里巷咽龜筮墓田開片石潏潏淚含悲叙史才

從事淮南府過亡友楊校書舊廳感念愀然下

有遂書
十韻

故人隨化往倏忽今六霜及我就拘限清風留此堂松
竹逾映蔚芝蘭自銷亡絕絃罷流水聞笛同山陽頽如
冰玉姿粲若鸞鳳章欲翦摧勁翮先秋落貞芳正平賦
鸚鵡文考頌靈光二子古不弔夫君今可傷黃墟旣杳

香元化亦茫茫豈必限宿草含悽灑衣裳

哭李晦羣崔季文二處士

華封背祝堯貴壽多男子二賢無主後貧賤大壯齒未
成鴻鵠姿遽頓驂駟趾子淵將叔度自古不得已

觀葬者

塗忽隨晝哭數里至松門貴盡人間禮寧知逝者魂笳
簫出古陌煙雨閉寒原萬古皆如此傷心反不言

成南陽墓

枯茭沒古基駸磔豐碑向晚微風起如聞坐嘯時

周平西墓

英威今寂寞陳跡對崇邱壯志清風在荒墳白日愁窮
泉那復曉喬木不知秋歲歲寒塘側無人水自流

蘓小小墓

萬古荒墳在悠然我獨尋寂寥紅粉盡冥冥黃泉深蔓
草映寒水空郊暖夕陰風流有佳句吟眺一傷心

題柳郎中茅山故居

一作柳谷
沂故居

下馬荒堦日欲曛潺潺石溜靜中聞鳥啼花落人聲絕
寂寞山窻掩白雲

哭張十八校書

數日前尋書未及
還答俄承凶訃

芸閣爲郎一命初桐州寄傲十年餘魂隨逝水歸何處

名在新詩衆不如蹉跎江浦生華髮牢落寒原曾素車
更憶八行前日到含悽爲報秣陵書

題亡友江畔舊居

寥落留三徑柴扉對楚江
蟪蛄集暗壁蜥蜴走寒窓
松蓋欹書幌苔衣上酒缸
平生斷金契到此淚成雙

權載之文集卷第七

權載之文集卷第八

唐權德輿字載之

挽詞歌詩

德宗神武孝文皇帝挽詞歌

覆露雍熙運澄清教化源賡歌疑庶績羽舞被深恩纂
業光文祖貽謀屬孝孫恭聞留末命猶是愛元元
梯航來萬國王帛慶三朝湛露恩方浹薰風曲正調晏
車悲鹵簿廣樂過簫韶最愴號弓處龍髯上紫霄

常時栢梁宴玉笋恩波遍今日穀林歸靈煙羽霏喬
山森羽衛渭水擁旌旂仙馭何由見耘田鳥自飛

順宗至德大安孝皇帝挽歌

三首時充
鹵簿使

十葉開昌運三辰麗德音薦功期瘞玉昭儉每捐金解
澤皇風遍虞泉白日沉仍聞起居注焚奏感人心
孝理本憂勤立功在膏神睿圖傳上嗣壽酒比家人仙
馭三清遠行宮萬象新小臣司吉從還扈屬車塵
候曉傳清蹕共瞻宮輅出迎風引綵旒遙想望陵愁弓
劍隨雲氣衣冠奉月游空餘駕龍處播落鼎湖秋

昭德皇后挽歌詞

淮水源流遠塗山禮命升往年求故劍今夕祔初陵鸞
鏡金波澁顰衣玉彩凝千年子孫慶孝理在蒸蒸

大行皇太后挽歌詞 三首王氏

筮水靈源濬因山祔禮崇從龍開隧路合璧向方中帳
殿金根出殿衣玉座空唯餘文母化陰德滿公宮
配禮歸清廟靈儀出直城九虞寧厚載壹惠易尊名曉
漏銅壺澁秋風羽翼輕容車攀望處孺慕切皇情
哀笳出長信嗚咽宮車進寶劔入延津淒涼祠殿新青
烏靈兆久白鸞瑞書頻從此山園夕金波照玉塵

惠昭皇太子挽歌詞 二首

前星落慶霄薤露逐晨飈官仗黃麾出仙遊紫府遙空
嗟鳳吹去無復鷄鳴朝今夜西園日重輪更寂寥

東朝聞楚挽羽翽依條轉天歸京兆新日與長安遠蘭
芳落故殿桂影銷空苑騎吹咽不前風悲九旗卷

贈文敬太子挽歌詞 二首

盤石公封重瑤山贈禮尊歸全榮備物樂善積深恩鴈
沼寒波咽鸞旌夕吹翻唯餘西靡樹千古灞陵原
銅壺曉漏初羽翼擁塗車方外留鴻寶人間得善書清
笳悲畫綬朱邸散長裾還似緱山駕飄飄向碧虛

贈鄭國莊穆公主挽歌 二首

追飾崇湯沐遺芳藹禁闈秋原森羽衛夜壑掩容輝睿
藻悲難盡公宮望不歸笳簫向煙霧疑是綵鸞飛

舊館閉平陽客車啟壽堂霜凝薜英落風度薤歌長淑
德圖書在皇慈禮命彰悽涼霸川曲壘樹已成行

贈魏國憲穆公主挽歌詞 二首

漢制榮車服周詩美肅雍禮尊同姓主恩錫大名封外
館留圖史陰堂閉德容容詞悲薤露千古仰芳蹤

秦樓曉月殘鹵簿列材官紅綬蘭桂歇粉田風露寒凝
笳悲駟馬清鏡掩孤鸞愍冊徽音在都人雪涕看

贈梁國惠康公主挽歌詞 二首

外館嬪儀貴中叅睿渥深初笄橫白玉盛服鏤黃金風
度簫聲遠河低婺彩沉夜臺留冊謚悽愴卽徽音

香靄異湘川飄飄駕紫煙鳳棲人已去鸞鏡月空懸霧
濕湯沐地霜凝脂粉田音容無處所應在玉皇前

故太尉兼中書令贈太師西平王挽歌詞

翊戴推元老謀猷合大君河山封故地金石表新墳劍
履悲長夜笳簫咽暮雲還經誓師處薤露不堪聞

故司徒兼侍中贈太傅北平郡王挽歌詞

授律勲庸盛居中鼎鼐和佐時調四氣宣力靜三河忽
訪天京兆空傳漢伏波今朝麟閣上偏軫聖情多

奉和禮部李尙書酬楊著作竹亭歌

直城朱戶相遷連九達舟轂聲闐闐春官自有花源賞

終日南山當目前晨搖玉珮趨溫室暮入竹溪疑洞天
煙消雨過看不足晴翠鮮飈逗深谷獨謠一曲泛流霞
閑對千竿連淨綠縈迴疏鑿隨勝地石磴巖扉光景異
虛齋寂寂清籟吟幽澗紛紛雜英墜家承麟趾貴劔有
龍泉賜上奉明時事無事人間方外興偏多能以簪纓
狎薜蘿嘗通內學青蓮偈更奏新聲白雪歌風入松雲
歸棟鴻飛滅處猶目送蝶舞閑時忽成夢蘭臺有客叙
交情返照中林曳履聲直爲君恩催造膝東方辨色謁
承明

奉和張僕射朝天行

元侯重寄貞師律三郡四封今靜謐丹轂常思闕下來
紫泥忽自天中出軍裝喜氣倍趨程千騎鳴珂入鳳城
周王致理稱申甫今日賢臣見明主拜恩稽首紛無已
凝旒前席皇情喜逢時自是山出雲獻可還同石投水
昔歲褒衣梁甫吟當時已有致君心專城一鼓妖氛靜
擁旆十年天澤深日日披誠奉昌運王人織路傳清問
仙醞嘗分玉竿濃御閑更輟金羈駿元正前殿朝君臣
一人負展百福新宮懸綵仗儼然合瑞氣爐煙相與春
萬年枝上東風早珮玉晨趨光景好塗山已見首諸侯
麟閣終當畫元老溫室沉沉漏刻移退朝賓侶每相隨

雄詞樂職波濤濶度交歡雲霧披自古全才貴文武
懦夫只解冠章甫見公抽匣百鍊光試欲磨鋌諒無取
和李中丞慈恩寺清上人院牡丹花歌

潛蕩韶光三月中牡丹偏自占春風時過寶地尋香徑
已見新花出故蘂曲水亭西杏園北濃芳深院紅霞色
擢秀全勝珠樹林結根幸在青蓮域艷藥鮮房次第開
含煙洗露照蒼苔龍眉倚杖禪僧起輕翅繁枝舞蝶來
獨坐南臺時共美閑行古剎情何已花間一曲奏陽春
應爲芬芳比君子

錫杖歌送明楚上人歸佛川

上人遠自西天至頭陀行遍南朝寺口翻貝葉古字經
手持金策聲泠泠護法護身唯振錫石瀨雲溪深寂寂
乍來松徑風更寒遙暎霜天月成魄後夜空山禪誦時
寥寥挂在枯樹枝真法當傳心不住東西南北隨緣路
佛川此去何時迴應真莫便遊天台

馬秀才草書歌

大垣馬正之子

伯英草聖稱絕倫後來學者無其人白眉年少未弱冠
落紙紛紛運纖腕初聞之子十歲餘當時時輩皆不如
猶輕昔日墨池學未許前賢團扇書艷彩芳姿相點綴
水映荷花風轉蕙三春併向指下生萬象爭分筆端勢

有時當暑如清秋蒲堂風雨寒颼颼乍疑崩崖瀑水落
又見古木飢飈愁變化縱橫出新意眼看一字千金貴
憶昔謝安問獻之時人雖見那得知

離合詩贈張監閣老

一作以離合詩
贈秘書監張薦

黃葉從風散共嗟時節換忽見鬢邊霜勿辭林下鵲躬
行君子道身負芳名早帳殿漢官儀巾車塞垣草交情
劇斷金文律每招尋始知蓬山下如見古人心

思張公

奉酬禮部閣老轉韻離合見贈

秘書監張薦

移居既同里多幸陪君子宏雅重當朝弓旌早見招植
根瓊林圃直夜金闈步勸深子玉銘力競相如賦間濶

向春闈日復想光儀格言信難繼木石強爲詞

私權閣

禮部權侍郎閣老史館張秘監閣老有離合酬

贈之什宿直吟翫聊繼此章 中書舍人崔

汾

脉脉羨佳期月夜吟麗詞諫垣則隨步東觀方承顧雪

林消艷陽簡冊漏華光坐更芝蘭室千載各芬芳節苦

文俱盛卽時仍並命翩翩紫霄中羽翮相輝映

詠篇

同前 中書舍人楊於陵

校德盡珪璋才臣時所揚放情寄文律方茂經邦術王

猷偕發揮十載契心期晝遊有嘉話書法無隱辭信茲

酌和美言與芝蘭比昨來念吟繹日覺祛蒙鄙效三作

同前 給事中許孟容

敏才司秘府文哲今超古亦有擅風騷六聯文墨曹左
三代意工藝千金字化識從臣謠人推仙閣吏如登
崑閬時口誦靈真詞孫簡下威鳳系霜瓊玉枝好

同前 給事中馮伉

車馬退朝後聿懷在文友動詞宗伯雄重美良史功亦
曾吟鮑謝二妙尤增價雨子樹反霜鴻戾天而樹烏啼夜

覃思各縱橫早擅希代名息心欲焚硯自覲陪羣英非惡

同前 戶部侍郎潘孟陽

詠歌有離合永夜觀酬答笥中操綵牋竹簡何足編意
深俱妙絕心契交情結計彼官接聯言初並清切翔集
本相隨羽儀良在斯烟雲競文藻因喜翫新詩

詞章美

同前 國子司業武少儀

少年慕時彥小悟文多變木鐸比羣英八方流德聲雷
陳美交契雨雲音塵繼恩顧各飛翔因詩覩瑰麗傳野
絕遺賢人希有盛遷早欽風與雅日詠贈酬篇

才思博

春日雪寄上張二十九丈大監請招禮部權曹

長迴文絕句 戶部侍郎潘孟陽

春梅雜落雪發樹幾花開眞須盡興飲仁里願同來

奉酬 秘書監張薦

遲遲日氣暖漫漫雪天春知君欲醉飲思見此交親

酬前

酒杯春醉好飛雪晚庭閑久意同前賞中林對遠山

五雜組

五雜組旗亭客往復還城南陌不得已天涯謫

數名詩

一區揚雄宅恬然無所欲二頃季子田歲晏常自足三
端固爲累事物反徽束四體苟不勤安得豐菽粟五侯
誠曄曄榮華或爲辱六翮未奮翔虞羅乃相觸七人稱

作者杳杳有遐躅八桂挺奇姿森森照初旭九歌傷澤
畔怨思徒刻促十翼有格言幽貞謝浮俗

星名詩

虛懷何所欲歲晏聊懶逸雲翼謝翩翩松心保貞實風
秋景氣爽葉落井逕出陶然美酒酣所謂幽人吉自當
輕尺璧豈復掃一室安用簪進賢少微斯可必

卦名詩

節變忽驚春臨風騁望頻支頤倦書幌步履整正巾時
鳥漸成曲雜芳隨意新曙霞連觀闕綺陌麗咸秦天地
今交泰雲雷昔邁屯中孚諒可樂書此示家人

藥名詩

七澤蘭芳千里春
瀟湘花落石磷磷
有時浪白微風起
坐釣藤陰不見人

古人名詩

藩宣秉戎寄
衡石崇勢位
年紀信不留
弛張良自媿
樵蘇則爲愜
瓜李世可畏
不顧榮官尊
每陳豐畝利
家林類巖嶽
負郭躬斂積
忌滿寵生嫌
養蒙恬勝智
疎鍾皓月曉
晚景丹霞異
澗谷永不謾
山梁冀無累
頗符生肇學
得展禽尙志
從此直不疑
支離疎世事

州名詩寄道士

金蘭同道義瓊簡復芝田平楚白雲合幽崖丹桂連松
峯明愛景石竇納新泉冀永南山壽歡隨萬福延

八音詩

金谷盛繁華涼臺列簪組石崇留客醉綠珠當座舞絲
淚可銷骨冶容竟何補竹林諒賢人滿酌無所苦匏居
容宴豆儒室貴環堵土鼓與汙尊頤神則爲愈革道當
在早謙光斯可取木鴈才不才吾知養生主

建除詩

建節出王都雄雄大丈夫除書加右職騎吏擁前驅滿
月張繁弱含霜耀鹿盧平明躍腰裏清夜擊珊瑚定遠

功那比平津業乃迂執心思報國効節在忘軀破膽銷
丹浦嘯蛾舞綠珠危冠徒自愛長轂事應殊成績封千
室疇勞使五符收功輕驃衛致理邁黃虞開濟今如此
英威古不侔閉關草玄者無乃誤爲儒

六府詩

金罍映玉俎賓友紛宴喜木蘭泛方塘桂酒啟皓齒水
榭臨空迥酣歌當座起火雲散奇峯瑤瑟韻清徽土梗
乃虛論康莊有逸軌穀城一編書談笑佐天子

三婦詩

大婦刺繡文中婦縫羅裙小婦無所作嬌歌遏行雲丈

人且安座金爐香正薰

安語

巖巖五岳鎮方輿八極廓清氛祲除揮金得謝歸里閤
象床角枕支體舒

危語

被病獨行逢乳虎狂風駭浪失棹櫓舉人看榜聞曉鼓
孱夫孽子遇妬母

大言

華嵩爲珮河爲帶南交北朔跬步內搏鵬作腊巨鼈鱗
伸舒軼出元氣外

小言

醯雞伺晨駕蚊翼毫端棘刺分眇域蛛絲結構聊廕息
蟻垤崔嵬不可陟

權載之文集卷第八

權載之文集卷第九

唐權德輿字載之

雜詩歌曲

雜詩五首

婉彼羸氏女吹簫偶簫史綵鸞駕非烟綽約兩僊子神
期諒交感相顧乃如此豈比成都人琴心中夜起
陽臺巫山上風雨忽清曠朝雲與遊龍變化千萬狀魂
交復目斷縹緲難比況蘭澤不可親凝情坐惆悵
淇水春正綠上官蘭葉齊光風雨搖蕩鳴珮出中閨一
顧授橫波千金呈瓠犀徒然路傍子怳怳復淒淒

碧樹泛鮮飈玉琴含妙曲佳人掩鸞鏡婉婉凝相矚文
往映束素香黛宜暎睒寂寞遠懷春何時來比目

含顰倚瑤瑟丹慄結繁慮失身不自還萬恨隨玉筍
蕭下山路團扇秋風去君看心斷時猶在目成處

廣陵詩

廣陵實佳麗隨季此爲京八方稱輻奏五達如砥平大
旆映空色笳簫發連營層臺出重霄金碧摩顙清交馳
流水轂迴接浮雲薨青樓旭日暎綠野春風晴噴玉光
照地顰蛾價傾城燈前互巧笑陌上相逢迎飄飄翠羽
薄掩暝紅襦明蘭麝遠不散管絃閑自清曲士守文墨

達人隨性情茫茫竟同盡冉冉將何營且申今日歡莫務身後名肯學諸儒輩書窻誤一生

古意

家人強進酒酒後能忘情持杯未飲時衆感紛已盈明月照我房庭柯振秋聲空庭白露下枕席涼風生所思萬里餘水濶山縱橫佳期憑夢想未曉愁雞鳴願得一心人當年歡樂平長筵暎玉俎素手彈秦箏睽睽呈巧笑惠音激淒清此願良未果永懷空如醒

雜言和常州李員外副使春日戲題十首并序

序闕

隨風柳絮輕映日杏花明無柰花深處流鶯三數聲蘭
橈畫舸轉花塘水映風搖路漸香任興不知行近遠更
憐微月照鳴榔

簷前曉月驚雙鷺戶外春風無百花粉署可憐閑對此
唯令碧玉泛流霞

枕上覺窗外曉怯朝光驚曙鳥花墜露滿芳沼柳如絲
風裏裏佳期遠相見少試一望魂杳眇

閑庭無事獨步春輝韶光滿日落蕊盈衣芳樹交柯文
禽並飛婉彼君子悵然有違對酒不飲橫琴不揮不揮
者何知音誠稀

江春好遊衍處處芳菲積綵舫入花津香車依柳陌綠
楊烟裏裏紅蕊鶯寂寂如何愁思人獨與風光隔曙月
漸到窻前移樽更就芳筵輕吹乍搖蘭燭春光暗入花
鈿絲竹偏宜靜夜綺羅共占韶年不遣通宵盡醉定知
辜負風烟

露洗百花新簾開月照人綠窻銷暗燭蘭徑掃清塵雙
鷺頻驚夢三桃競報春相思寂不語珠淚灑紅巾

雨歇風輕一院香紅芳綠翠接東牆春衣試出當軒立
定被隣家暗斷腸

春風半春光遍柳如絲花似霰歸心勞夢寐遠目傷遊

盼可惜長安無限春年年空向江南見

相思曲

一作長相思

少小別潘郎嬌羞倚畫堂有時裁尺素無事約殘黃鵲
語臨粧鏡花飛落繡床相思不解說明月照空房

古樂府

光風潛蕩百花吐樓上朝朝學歌舞身年二八墜侍中
幼妹承恩兄尙主綠窻珠箔繡鴛鴦侍婢先焚百和香
鴛啼日出不知曙寂寂羅幃春夢長

渡秋江怨二首

秋江半秋月明孤舟獨夜萬里情萬里情相思遠人不

見兮淚滿眼

渡秋江兮渺然望秋月兮嬋娟色如練萬里遍我有所
思兮不得見不得見兮露寒水深耿遙夜兮傷心

秋閨月

三五二八光如練海上天涯應共見不知何處玉樓前
乍入深閨玳瑁筵露濃香逕和愁坐風動羅帷照獨眠
初卷珠簾看不足斜抱瑩篴未成曲稍映粧臺臨綺窻
遙知不語淚雙雙此時愁望知何極萬里秋天同一色
靄靄遙分陌上光迢迢對此閨中憶早晚歸來歡讌同
可憐歌吹月明中此夜不堪腸斷絕願隨流影到遼東

薄命篇

一作妾
薄命篇

昔住邯鄲年尙少只是嬌羞弄花鳥青樓碧紗大道邊
綠楊日暮風裊裊嬋娟玉兒二八餘自憐顏色花不如
麗質全勝秦氏女藥砧寧用專城居歲去年來年漸長
青蛾紅粉全堪賞玉樓珠箔但閑居南陌東城詎來往
韶光日日看漸遲標梅旣落行有時寧知燕趙娉婷子
醜嫁幽并游俠兒年年結束青絲騎出門一去何時至
秋月空懸翡翠簾春幃嬾卧鴛鴦被沙塞經時不寄書
深閨愁獨意何如花前拭淚情無限月下調琴恨有餘
離別苦多相見少洞房愁夢何由曉閑看雙燕淚霏霏

靜對空床魂悄悄鏡裏紅顏不自禁
陌頭香騎動春心
爲問佳期早晚是人人忽解有黃金

放歌行

夕陽不駐東流急榮名貴在當年立
青春虛度無所成
白首銜悲亦何及拂衣西笑出東山
君臣道合俄頃間
一言一笑玉墀上變化生涯如等閑
朱門杳杳列華戟
座中皆是王侯客鳴環動珮暗珊瑚
駿馬花驄白玉鞍
十千斗酒不知貴半醉留賓邀盡歡
銀燭煌煌夜將久
侍婢金韉瀉春酒春酒盛來琥珀光
暗聞蘭麝幾般香
乍看皓腕映羅袖微聽清歌發杏梁
雙鬢美人君不見

一一皆勝趙飛燕迎杯乍舉石榴裙勻粉時交合歡扇
未央鍾漏醉中聞聯騎朝天曙色分雙闕烟雲遙靄靄
五衢車馬亂紛紛罷朝鳴珮驟歸鞍今日還同昨日歡
歲歲年年恣遊讌出門滿路光輝遍一身自樂何足言
九族爲榮真可羨男兒稱意須及時閉門下帷人不知
年光看逐轉蓬盡徒詠東山招隱詩

雜言
C 旅館雪晴又覩新月衆興所感因成雜言

寥寥深夜雪初晴樓上雲開月漸明池中片影依稀見
簾外清光遠近生皎皎晴空疑破鏡廣庭積素偏相映

珠簾卷却光更深玉指持來色逾淨夢覺青樓最可憐
嬋娟素魄滿寒天天地寥寥同一色秦淮楚江無限極
歸鴻斷猿何處聲深閨旅館遙相憶長安五侯華閣開
嘉賓列座傾金罍賞明月翫流雪纖手蛾眉座中設清
歌一聲無斷絕夜已久樂未闌狐裘獸炭不知寒珠環
翠珮聲珊珊履舄紛紜桂袖攢朱顏倚醉盡君歡人生
少年全不久相看且勸杯中酒丈夫富貴自有期映雪
讀書徒白首

玉臺體十二首

鶯啼蘭已紅見出鳳城東粉汗宜斜日衣香逐上風情

來自不覺暗駐五花驄

嬋娟二八正嬌羞日暮相逢南陌頭試問佳期不肯道
落花深處指青樓

隱映羅衫薄輕盈玉腕圓相逢不肯語微笑畫屏前
知向遼東去由來幾許愁破顏君莫怪嬌小不禁羞
樓上吹簫罷閨中刺繡闌佳期不可見盡日淚潸潸
淚盡珊瑚枕魂銷玳瑁床羅衣不忍著羞見繡鴛鴦
君去期花時花時君不至簷前雙鷺飛落妾相思淚
空闌滅燭後羅幌獨眠時淚盡腸欲斷心知人不知
秋風一夜至吹盡後庭花莫作經時別西隣是宋家

獨自披衣坐更深月露寒隔簾腸欲斷爭敢下堦看
昨夜裙帶解今朝蟬子飛鈿華不可棄莫是蘂砧歸
萬里行人至深閨夜未眠雙眉燈下掃不待鏡臺前

贈友人

時友人新有別恨者

知向巫山逢日暮輕鞋玉佩暫淹留曉隨雲雨歸何處
還是襄王夢覺愁

舟行見月

月入孤舟夜半晴寥寥霜鴈兩三聲洞房燭影在何處
欲寄相思夢不成

雜興五首

水調歌頭
聚鬢愁眉時勢新初筭絕代北方人一顰一笑千金重
肯似成都夜失身

乍聽絲聲似竹聲又疑丹穴九雛驚金波露洗淨於晝
寂寞不堪深夜情

琥珀樽開月映簾調絃理曲指纖纖含羞斂態勸君住
更奏新聲刮骨鹽

乳鷺雙飛鶯亂啼百花如繡照深閨新妝對鏡知無比
微笑時時出瓠犀

巫山雲雨洛川神珠襖香篝穩稱身惆悵粧成君不見
含情起立問傍人